

Deskrepansia

Poko dia pasá mi a opservá un hobensita ku ainda ta na skol básiko trahando duru. Mi a atmirá su esfuerso; el a hasi e trabou bon, no riba riba. I el a hasié su so, sin ku su mama mester a keda papia. Ma mi'n por kòrda ki dia tabata e último biaha ku mi a mira un yònkuman di e mésun edat traha duru asina.

Un deskrepansia grandi ta eksistí den e manera ku mayornan ta kria nan yunan hòmber i muhé. E mama ta lidia ku e yu muhé, i ta tren e pa e ta un persona responsabel. Fo'i tempu ku e ta mucha, e ta laba tayó, bari, mòp, stòf, laba paña.

Ma kiko di e yu hòmber? Hopi yònkuman nunca ta siña karga responsabilidadat. Chapi yerba den kurá? Esei ta trabou muchu pisá; e ta kapas pa haña blar! Laba tayó? Tampoko e no por...ta trabou di hende muhé. Skol...HAVO, VWO...sigui studia? Pakiko kibra kabes tantu asina? Ta muchu mas fásil pa bishitá LTS di bes en kuando, te ora ta fada òf kaba. Piki paña den su kamber? No por! Ta p'esei e tin mama tòg!

Fo'i chikitu, nos ta tren nos lídernan maskulino di mañan pa hasi solamente loke nan tin smak di hasi. Nos ta siña nan pa no kansa kurpa pa logra siertu meta, pa no pèrsistí te kaba, pa no sea responsabel. Nos ta eduká nan pa pensa di nan mes so, pa buska nan propio interes egoísta so. Nos ta laga nos yunan hòmber pa nan kuenta. Nos ta enkurashá nan pa sali ku amigunan, sinta pornada banda di kaya, dibertí, fiesta, kore kaya.

Ma **hinkando e mentalidat aki den nos yunan hòmber, nos ta siña nan pa ta mal trahadó, mal suidadano, mal bisña, i mal esposo.** Por ehèmpel, ora e ta keda kas, su mayornan ta bis'é “no hasi kos di hende muhé”. Nos ta siñ'é ku kas ta lugá pa hende hòmber “tènk”: kome, sali; bin kas, baña, kome, sali; bin kas, drumi, kome, sali... Hende muhé ta responsabel pa keda kas; salimentu ta responsabilidadat di hende hòmber.

Ma ta ken di ku un hende hòmber no mester yuda na kas? Ta ken di ku hende muhé so mester laba tayó, bari, piki paña? Esei no ta den Beibel! Esei ta nos mes idea absurdo. Echu ta ku un hòmber ku ta yuda na kas, ta demonstrá apresio pa su esposa.

Beibel ta bisa bon kla, “*Esposonan, stima boso esposanan ...*” (Kolosensenan 3:19). Hopi yònkuman ta papia bunita ku nan yùfrou tokante amor. Ma di bèrdad, nan tin ningun idea kiko stimashon bèrdadero ta. Bisá bòt, hopi yònkuman ke un muhé den nan kas pa tres motibu: pa sèks, haña yu, i komo un kriá! Fuera di esei, nan tin e muhé pa nada. Kompañerismo? Nan ta haña esei serka nan amigunan. Komunikashon? Esei ta bai bon, solamente si e muhé ta tende di e hòmber.

Esei no ta fundeshi pa un matrimonio felis? Nò! Un bon matrimonio ta rekerí tempu huntu, komunikando ku otro. Na nos islanan, hopi matrimonio ta krekeché **pasobra** e hòmber ta sali tur ora...no tin komunikashon. I ora e kabayero ta na kas, e señora, desesperá pa kompañerismo i komunikashon, ta papia bai gol, kansando e hòmber asina tantu ku e meneer ta buska salimentu atrobe, koriendo pa responsabilidadat atrobe.

Ta tempu pa mayornan lamta for di soño. **Ta tempu pa siña nos yunan hòmber pa tuma responsabilidadat manera hòmber.** Ta tempu pa enkurashá nan pa sigui studia, tren nan pa traha duru (na kas tambe!).

Skritura ta bisa: “*Esun ku engendrá un bobo ta engendr'é pa su mes tristesa, i tata di un bobo no tin goso. Un yu bobo ta tristesa pa su tata, i amargura pa esun ku a pon'é na mundu*” (Proverbionan 17:21,25). Un “bobo” den e konteksto aki ta un persona ku ta moralmente ignorante i irresponsabel.

Si nos ta sigui den e kaminda ku nos ta bai, hopi tristesa ta warda mayornan den futuro. Nos tin ku kuminsá hasi máksimo esfuerso pa siña nos yunan muhé i hòmber ta hende responsabel. Nos tin ku pone un paro na e dekrepancia ku nos ta hasi!